

FILOHA RAVALOMANANA

# Firaisankinam-pirenena, fanavotana an'i Madagasikara ny MAP Plus

Fanavotana an'i Madagasikara ny MAP Plus hoy ny filoha Marc Ravalomanana filoha nasionalin'ny antoko Tiako i Madagasikara (TIM). Nambarany fa : "nifampizara ireo Vina na Vision ao anatin'ny MAP Plus isika kanefa raha tiantsika ny hanatrarana ireo tanjona ireo dia izao no lalan-kizorantsika rehetra: ho kolokolointsika sy ho arovantsika ny tontolo iainana. Homentsika lanja manokana ny fananantsika kolontsaina sy fomba nentim-paharazana maro samihafa. Hireharena amin'ny maha Malagasy antsika isika, hitambatra ho iray anatin'ny firaisankinam-pirenena. Hiasa hiaraka isika satria firenena iray." Ankoatra izany, milaza ihany koa izy fa : "miompana tanteraka amin'ny fijerena akaiky sy haingana ny olona manontolo sy ny maha-olona manontolo ny paikady sy ireo tetikasa rehetra ao anatin'ny MAP Plus. Tsy misy firenena mandroso mantsy raha toa ka tsy manana ny hasiny, ny hajany ary ny maha-izy azy ny olom-pirenena ao aminy, na eo amin'ny lafiny ara-pivelomana izany, na eo amin'ny lafiny famokarana, na eo amin'ny lafiny arapahasalamana, na eo amin'ny lafiny fanabeazana, fa indrindra eo amin'ny andavanandrom-piainany manontolo. Manangana fotokarena na Capital ho an'ny firenentsika ny MAP Plus ary laharam-pahamehana ho antsika ny fotokarena maha olona na Capital humain." Ny tanjona amin'ity vinam-piarahamonina ity, ho lasa Firenena miroborobo i Madagasikara, hanana toekarena misondrotra haingana i Madagasikara, hahita fahombiazana amin'ny fifaninanana eo anivon'ny tsena iraisam-pirenena ny firenentsika.

Isambilo



Ny filoha Marc Ravalomanana.

## Rajoelina ninia naka zom-pirenena Frantsay Nitory eny amin'ny HCC i Hajo sy ny HVM



Mitodika etsy Ambohidahy ny mason'ny rehetra anio.

Tantara mitohy ny mahakasika ny firotsahan-kofidian'ny filoha Andry Rajoelina, sy izy ninia naka zom-pirenena Frantsay ka maha very ny fizakany ny zom-pirenena Malagasy. Noho izay antony izay, sy noho izao ho fi-trehana fifidianana izao. Nametraka fitoriana teny amin'ny HCC, Fitisarana Avo momba ny Lalampangrenana ny kandidan'ny MMM, Hajo Andrianainarivelo omaly, satria manit-sakitsaka ny lalana velona ny mbola hiltasahan'Andriamatoa Andry Rajoelina ho fidiana. Toy izany koa, mangataka ny fanafoanana ny firotsahan-kofidian'i Andry Rajoelina teny amin'ny HCC koa ny avy amin'ny antoko HVM. Namafisin'ny HVM fa tsy mahafeno ny fepetra takian'ny lalana ity kandida ity.

Ny Valosoa

## Annick Ratsiraka sy ny Arema

### Maro ireo tonga nihaona taminy tany Antsiranana sy Anivorano Nord

Natomboka tany Antsiranana faritra Diana ny 03 septambra teo, tao amin'ny Hotel de la Poste, ny fihonon'ny kandida filohampirenena Annick Ratsiraka sy ireo mpikambana amin'ny birao politikan'ny antoko Arema. Feno hipoka ny trano nanaovana ny fivoriana.

Maro ny vehivavy Arema nanatrika tao sy ny tanora ary ireo mpikatroka Arema tranainy. Nafana ny fihononana izay nafanan'ny vehivavy Arema marobe. Ny hariva dia nandeha tany Anivorano Nord ny delegasionina notarihan'ny kandidan'ny antoko Arema Annick Ratsiraka. Nisy fahatarana ora 2 ny fihononana tao nefa nian-dry tao daholo ny olona marobe hanatrika ny fihononana tamin'ny antoko



Ny kandida Annick Ratsiraka tany Avaratra.

Arema. Nisy ny dia antongotra 1km nankany amin'ny espace nanaovana ny fivoriana. Feno hipoka ihany koa ny trano

ary maro be ny olona nitsangana nanatrika ny fihononana. Nisy ny fihainoana ny he-tahetan'ny olona tahaka

ny fanaon'ny antoko Arema isaky ny mitsidika azy ireo.

Isambilo

## Ny Valosoa sy fakafaka

### Miala Rajoelina. J- 0 (Jour J) Anio ny fotoana, veloma tsy ho tafaverina intsony

Ny zava-misy eto amin'ny firenena izany izao, dia ny filohan'ny Repoblika Andry Rajoelina dia vazaha frantsay, ny Ben'ny tanàna amin'ny renivohitr'i Madagasikara vazaha ihany koa. Ka dia inona izany fa miaina amin'ny faha-tany vazaha, faha-fitondrana vazaha ny firenena malagasy, ary efa ho 10 taona izao no nisian'izany. Zary miverina tanteraka araka izany ny endri-panjanahantany satria olon'ny frantsay no mitondra sy efa nitondra ny firenena tao anatin'ny dimy taona izay, ary miseho amin'ny endriny vaovao satria ilay vahoaka malagasy no nofitahana nifidy azy. Tsy ny vahoaka malagasy iray manontolo aloha no nifidy azy, fa ampahana vahoaka ihany. Natao avokoa ny fomba rehetra nampandianana azy tamin'ny taona 2018. Nisy firaisana tsikombakomba ratsy tao anatin'izany tamin'izany, satria dia nangina sy ninia nikimpy hatramin'ny filohan'ny HCC tamin'izany fotoana izany tsy hamoaka ny tena marina ho fantatry ny vahoaka malagasy.

Manamafy izay maha-tany vazaha ny tany sy ny fanjakana izay ary ny endri-panjanahana vaovao ampiharina ankehitriny, dia ny fisian'ny « tafi-bahoaka » na tafi-panjakana, fa manahirana ihany ankehitriny no ilazana azy hoe mpitandro filaminana, manerana ny faritra maro eto an-drenivohitra. Mampahatsiahy ny tantara nitranga tamin'ny 28-29 Martsa 1947 ny zava-misy ankehitriny. Nambaran'ireo ray aman-dreny niaina tamin'izany fotoana izany, izay nanontaniana, fa feno na rakotra miaramila frantsay nanerana ny renivohitra, sy nivezivezy eran'ny tanàna, tsy nahafahana nihetsika. Inona no mahasamihafa izany amin'ny ankehitriny ? Mitovy tanteraka ny fomba atao, ary mbola ratsy lavitra kokoa aza ny amin'izao. Manaporofa izany ny fisakanana nataon'ireo tafi-panjakana ireo ny fikasana saika ataon'ireo avy amin'ny fanoherana na ireo kandida hanao fanambarana miaraka teny Mandrimena sy teny amin'ny By-pass. Maneho mazava tsara ny zava-misy, fa fomba fiasan'ny mpanjanatany frantsay, no ampiharin'ny fitondrana ankehitriny. Iray manampy izany ihany koa ny fampizarazarana ny Malagasy, fa tsy misy finjavana fampiraisan-kina. Maneho izany ny tsy firahirahiana nandritry ny dimy taona naha teo amin'ny fitondrana azy, ireo gadra politika sy ny fitakiana nataon'izy ireo. Tsy norahirahiana ny fanonerana azy ireo ary nodiana tsy hita izy ireo. Niharihary ihany koa ny fanilihana ankolafin'olona na ampahana vahoaka izay tsy nomba sy nanohana azy. Porofa mitohoka amin'ny tendany ireny rehetra ireny. Politika vazaha mpanjanatany izany amin'ny fizarazarana hanjakana, ary ambaniana ny fampiraisankinan'ny vahoaka.

Ho hatraiza ity fomba fiasa faha- fitondrana vazaha frantsay izao? Misy fetrany ny zava-drehetra, indrindra ny fotoana itondrana firenena. Soa ihany fa tokony hametra-pialana anio: J- 0 na Jour J ny filoha Rajoelina satria ho kandida amin'ny fifidianana ho avy, anio no tokony hanaovam-beloma azy sy ny fitondrany ary tsy tokony ho tafaverina intsony, satria tsy miraharaha ny vahoaka Malagasy sy ny olany. Ankoatra izany, ny Malagasy rahateo, izay tena tia ity tanindrazana iombonana ity sy saropiaro amin'ny fiandrianam-pirenena, dia tsy hanaiky velively ho olon'ny frantsay sy frantsay no mbola hitondra ny firenena. Efa tapitra ny fe-potoana hisian'ny endri-panjanahana vaovao ary efa rivotra mitsoka aty amin'ny kaontinanta afrikana izany amin'izao fotoana izao. Ny fanambarana tetsy amin'ny Lapan'ny fanatanjahantena Mahamasina tamin'ity herinandro ity dia efa karazan'ny fanaovam-beloma nataony amin'ireo mpiara-dia aminy,...

Sôh'son